

八旗通志

第 六 冊

〔清〕鄂爾泰等修

東北師範大學出版社

八旗通志初集卷之一百二十九

宗室王公列傳一

禮親王代善

原封異親王滿達海子貝勒常阿岱孫奉恩將軍席倫圖

康親王傑書父追封親王祐德兄郡王精濟子康親王椿泰

穎親王薩哈廉


順承郡王勒克德渾

原封順承郡王勒爾錦弟順承郡王諾羅布

謙郡王瓦克達

輔國公馬瞻

八旗通志 初集



正紅旗和碩禮親王代善，太祖高皇帝次子也。生而英毅，智勇過人。從征哈達、輝發、葉赫等國，論功封爲貝勒。丁未年，以瓦爾喀蜚攸城人，苦烏喇國布占泰貝勒之虐，乞移家歸附。代善與舒爾哈齊貝勒、洪巴圖魯貝勒及一等大臣費英東、扈爾漢轄，率兵三千往徙之。乘夜陰晦而行，見大霧之上有光，衆以爲異。捫視無有，復樹之，光如初。舒爾喀齊（二）貝勒疑爲凶兆，欲回兵，代善與洪巴圖魯貝勒並決意進兵。遂至蜚悠城，盡收環城屯寨凡五百戶，令扈爾漢轄率兵三百衛之先行。布占泰發兵萬人邀諸路。次日，代善與洪巴圖魯諸貝勒至，策馬奮怒，率勵軍士進擊。衆軍士皆奮勇願効死，遂渡河。代善與洪巴圖魯貝勒各率兵五百，分二路緣山奮擊，烏喇兵遂敗。代善追及烏喇統兵貝勒博克多，從馬上左手攫其胄而斬之。時天氣清明，忽陰晦，大雪寒冽。被傷敵兵，棄甲逃者甚衆。是役也，陣斬博克多貝勒父子，生擒常住貝勒父子及胡里布貝勒，斬三千級，獲馬五千匹，甲三千副。太祖嘉其功，賜名古英巴圖魯。

癸巳年九月，烏喇國布占泰貝勒復背盟，代善隨太祖統大兵征之。布占泰率兵三萬，越伏爾哈城而軍。時領兵諸貝勒大臣欲戰，太祖欲復加申諭，未忍加兵。代善曰：「所慮者，無計令布占泰出城耳。今彼兵既在平原曠野，舍此不戰，何故興兵而來？厲兵秣馬，亦無用矣。今士飽馬騰，列陣在此，當決戰也！」太祖曰：「爾等欲戰，即戰可也。」時諸貝勒大臣及軍士皆踴躍，遂進兵。烏喇兵大敗，十損六七，餘皆棄兵甲四散而遁。我兵乘勢奪門，遂克其城。布占泰率敗兵不滿百人，急回城下。見城陣悉樹我軍旗幟，大驚而奔。代善統精兵截戰，布占泰勢不能敵，遂遁，又損兵過半，餘皆大潰。布占泰僅以身免。

天命元年，太祖正大號，叙羣臣功，封和碩大貝勒四人，以代善爲首。四年三月，明大發兵四路來侵，達爾漢轄率兵先行，代善率兵二千繼之。遇明遊擊喬一琦兵，擊破之，擒一琦。

六年七月，鎮江城中軍陳萬策與居民潛通於明將毛文龍，令別堡之民詐稱兵至，大呼噪，城中驚擾。

萬策乘亂，執城守遊擊佟養正，殺其子豐年，並從者六十人，叛投毛文龍。太祖聞之，命代善率兵三千，遷鎮江沿海居民於內地。

十一年八月十一日，太祖龍馭上賓，代善及子岳託、薩哈廉共作議書詣朝，以書示大貝勒阿敏等，言推戴太宗文皇帝嗣統，衆皆喜。太宗讓至再三，衆議堅不可却，然後從之。十一月，奉命率精兵萬人，往征蒙古喀爾喀扎魯特部落，執巴克貝勒與其二子，及喇什希布、代青、桑噶爾寨等十四貝勒。殺吳爾寨圖貝勒，其子女人民牲畜，盡俘獲而還。

天聰元年五月，奉命與阿敏貝勒、碩託貝勒率正紅旗、鑲紅旗、鑲藍旗兵征明，攻錦州，圍其城。三年十一月，太宗親統大兵征明。至北京，前哨瞭見明大總兵滿桂、宣府總兵侯世祿等以兵來援，俱至德勝門。代善領白甲擺牙喇兵及蒙古兵前進攻擊，追至隘口，掩殺甚衆。十二月，隨太宗率擺牙喇兵及礮手共五百名，往視薊州。代善先發，會有山海關步兵五千來援薊州。距城二里許，與我兵遇。敵兵不及入城，遂立營，環列車盾鎗礮。代善與諸貝勒親率兵衝入，殲其衆。

四年二月，明兵部尚書劉之綸率兵至遵化，營於山上。代善奉命率八旗擺牙喇兵往攻之，以兵圍山，招綸降，不從，遂縱兵攻破其營，盡殲之。五年七月，和碩圖額駙固山下牧馬取草兵，遇明臺軍出，被殺者十人，失馬三十五，駝十。代善與濟爾哈朗貝勒等率兵三千，以紅衣礮、大將軍礮圍攻其臺，焚近臺房屋百餘間，獲駝馬數十，留兵守之。

七月，我師征明，圍大凌河城，明遣兵來援，拒城十五里而軍。代善隨太宗率滿洲、蒙古、舊漢兵約二萬往視之，敵馬步兵合營四面，列大小礮及鳥鎗。我右翼兵衝入敗之，生擒明監軍道張春及武官張洪謨、楊華徵、薛大湖等。時被擒各官，見太宗皆跪拜，獨張春不跪。太宗怒，援弓欲射之。代善諫曰：「我前此陣

獲之人，何嘗不收養。此人既以死爲貴，奈何殺之以遂其志乎。」遂置之。

八年五月，隨太宗率大兵征明，出榆林口。六月，與子薩哈廉貝勒、碩託阿格率兩紅旗及蒙古兵，自喀喇俄保地方入邊，攻得勝堡。正紅旗尼哈里先登克之，盡殺其兵，城守參將李全自縊死，鎮江堡民皆逃散。進兵攻大同懷仁縣，未克，駐兵朔州。七月，太宗遣敦多惠喀木圖諭代善，率兵越馬邑縣駐劄。八月，太宗親攻大同，代善率兵來會。太宗出迎，命入營，同坐黃幄中。代善以所獲之物進獻，賜代善宴。宴罷，復出營親送之。

天聰十年四月，太宗建國號大清，改元崇德，大封功臣，首晉封代善爲和碩兄禮親王。十二月，從太宗征朝鮮，受其降以歸。

八年八月，世祖章皇帝嗣統。郡王阿達禮、貝子碩託謀立睿王多爾袞。禮親王代善發其謀，阿達禮、碩託伏誅。阿達禮爲代善孫，碩託，代善第二子也。衆咸謂王大義滅親，比烈周公云。順治五年十月壬寅薨，年六十有六。以第七子滿達海襲親王爵。賜號曰異。是年，定賜諸王以下修造園塋銀兩例，親王銀五千兩。奉旨，和碩禮親王與衆不同，特賜銀一萬兩。六年十月，立墓碑紀其功。

康熙十年五月，聖祖仁皇帝特表王功績，追謚曰烈。再建碑曰：「自古帝王創業垂統，必懋建本支，以作藩屏。故生隆顯爵，歿錫豐碑，親親賢賢，典甚重也。爾和碩禮親王代善，乃太祖高皇帝次子，太宗文皇帝兄也。忠純天挺，端格性生，秉志精誠，夙懷英毅。當太祖高皇帝草昧經綸之時，以本支之親，膺心膂之任。披堅執銳，不避矢石，捐軀裹創，戮力疆場。如征哈達，平輝發，定葉赫等國，王親率將士，多所斬獲。及攻烏喇國，王陣斬兵主貝勒博克多，大破其軍，嘉乃丕績，因賜名古英巴圖魯。嗣克開原，下鐵嶺，取遼東，肇基立業之隆。王或以智取，或以戰勝，多著奇勳。太祖高皇帝初登大寶，分封四和碩大貝勒，以王爲大貝

勒。太宗文皇帝平定朝鮮，收服察哈爾等蒙古諸國，攻明郡縣，式廓疆圉。王出則効力戎行，入則宣猷廊廟，無不殫厥心力。崇德元年，初封宗室王爵，以王爲和碩兄禮親王。世祖章皇帝入關定鼎，勦除流寇，殄滅福王，統一寰區。王丕襄泰治，翊贊鴻猷，裨益實多。嗚呼，若王者，可謂忠冠當時，而功昭後世者矣。乃以疾薨逝。世祖章皇帝時切哀思，每深痛悼，特賜祭葬，勅建豐碑。朕今追念前徵，加謚曰烈。復念勳名既載於盟府，而風烈宜表於隧阡。詳述懋功，顯揚忠義，重勒貞珉，用傳不朽，以示敦睦懿親之意。」云爾。

子八人，長子克勤郡王岳託，第三子穎親王薩哈廉，俱自有傳。

原封異親王滿達海，禮親王代善第七子。天聰二年大兵征明圍錦州，滿達海率師往截明杏山糧運於海上，取之。崇德五年復從大兵圍錦州，擊敗杏山援兵，又以紅衣礮擊敗松山馬兵。六年五月，封輔國公。從肅親王豪格駐劄松山。以本旗兵擊敗明松山兵。錦州城中有兵出城刈草，率右翼轄員擊走之。明錦州兵來犯我鑲紅旗營，滿達海助擊敗之。明經略洪承疇以兵十三萬來援錦州，滿達海以步戰破其三隊。洪承疇兵復來犯，力拒之，人馬俱被創。肅親王豪格援之曰：「爾馬傷矣，此有黃馬，宜速易之。」比易馬而明兵大至，乃返擊明兵，殿後而還。明兵復乘天雨來犯，率兵擊却之。明總兵吳三桂率兵據山立營，滿達海領吉爾丹肅兵往擊，毀其營。十一月從豫郡王多鐸赴寧遠，有明兵運粟於海上，率兵擊取之。七年從鄭親王濟爾哈朗等征明克塔山。八年從鄭親王濟爾哈朗克明中後所、前屯衛，俱有功。是年八月命掌理都察院事。

順治元年，從睿王多爾袞入山海關，擊走流賊，復敗流賊於慶都縣。二年，隨英親王阿濟格奪黃河渡，進克沿邊三城。圍流賊於延安府。守護紅衣礮，攻克其城，又追流賊至湖廣承天府，破僞蕭王。十月，晉封固山貝子。三年，從靖遠大將軍肅親王豪格征四川，破流賊張獻忠。四年，分兵略遵義、夔州、茂州、榮昌、

隆昌、富順、內江、資陽等處，多斬僞王、僞巡撫、道員、僞總兵、副將等官。川寇悉平。

六年四月，襲父親王爵。七月，授征西大將軍。與多羅謙郡王瓦克達征大同叛鎮姜瓖，攻朔州、寧武等處。八月，克朔州馬邑，降寧武關僞總兵劉偉，僞道員趙夢龍，及僞副將以下官弁五十餘員，馬步兵五千四百餘名。靜樂縣寧化等所，山寨悉平。九月，克汾州，斬僞巡撫姜建勳，僞布政使劉炳業。十月，遣肅章京素渾圖平遙，僞知縣劉三元棄城走。又遣署肅章京希爾根圖太谷，以紅衣礮破其城，僞知縣李成沛、僞都司吳成器率衆遁，遣兵追殲之。時潞安府賊分兵拒沁州，又圍遼州，隨遣多羅貝勒拜尹圖、肅章京素渾馳赴沁州。賊聞風遁去，遂拔沁州，趨潞安府，賊又遁。僞道員胡國鼎來戰，大兵圍之。比夜遁去，遣兵邀擊之，悉斬其衆。又遣鎮國公韓岱、署肅章京希爾根赴遼州，擊賊兵大破之，屯留襄垣。榆社、武鄉等縣俱降。是月，奉召還京。

八年二月，給封號異親王。三月，命掌理吏部事。六月，世祖章皇帝幸南苑，特賜鞍馬。九年二月薨，年三十一。賜祭葬如典禮，諡曰簡。

七月，子常阿岱襲封異親王。十六年十月，以滿達海曾諂媚睿王多爾袞，降常阿岱爵爲貝勒。追奪滿達海諡號及碑。詔以多羅康郡王傑書襲伊祖代善親王爵。康熙四年四月，常阿岱薨，諡懷愍，以子星尼降襲固山貝子。十五年二月，封常阿岱子席倫圖爲奉恩將軍。三十六年七月，席倫圖從征厄魯特有功，加一拖沙喇哈番。

和碩康親王傑書，禮親王代善之孫也。父曰祐塞，禮親王第八子。順治三年六月，封鎮國公。是年卒，以傑書兄精濟襲封鎮國公，尋晉多羅郡王。六年三月薨，諡懷愍。十月，傑書嗣封多羅郡王。八年二月，賜封

號曰康郡王。十五年五月，詔以傑書爵，追封其父祐塞爲多羅郡王，諡惠順。順治十六年十二月，異親王常阿岱降貝勒，乃以傑書襲其祖代善親王爵，仍號康。康熙元年三月，追贈其父祐塞亦爲親王。

十三年春三月，逆藩耿精忠據福建反，分遣賊兵犯浙江、江西。六月，授傑書爲奉命大將軍，帥師同貝子傅拉塔由浙江進剿。是年冬，疏報耿逆僞都督徐尚朝犯金華。遣副都統馬哈達斬其將吳榮先等三十餘人，殲賊兵二萬衆。十二月，遣夸蘭大拜色、副將牟大寅擊賊於紫瑯山，斬獲甚多。僞都督徐尚朝復率馬步兵三萬，土寇二萬，來犯金華。遣都統巴雅爾等破之於積道山，殺賊二萬餘，招撫僞總兵官等七百餘人，獲僞勅印軍器無算。

十四年正月，疏報副都統馬哈達等破僞總兵徐尚朝，殺賊千餘，恢復永康、縉雲二縣。二月，疏報夸蘭大張所志運礮至上虞縣，遇賊方懋功來邀截，遂奮勇進剿，生擒賊四十五名，追殺三百餘名。僞總兵馮公輔自義烏縣遁，盤踞武義縣附近諸山。遣署前鋒統領希佛敗之於苦竹地方，生擒僞都司何處儒等官三十二名。復義烏、武義二縣。又疏報耿逆僞總兵沙有祥踞桃花嶺險要，屯守處州。遣副都統馬哈達、總兵官李榮勛之，復處州。賊敗走仙居。遣副都統伯穆和林等三路分進，至白水洋連破僞鎮海都督林坤等十三營，我師直抵仙居城。耿逆梟帥曾養性又助賊兵一千堅守，屢招不降。遣署護軍參領額庫納以兵伏城西，署參領齊林布尾陣助戰，署參領禪拜等以梯三面攻之。於是賊由西門遁，我伏兵起，盡殲之。生擒僞都督僉事朱富，獲礮三百五十八位及僞關防軍器無算。遂復仙居。

三月，聖祖仁皇帝命杭州都統喇哈達赴傑書軍前參贊，併令寧海將軍貝子以下聽傑書節制。三月，疏報平南將軍賴塔敗僞將軍馬九玉於衢州，斬千餘級，擒僞都司一名。時耿逆僞帥馮公輔，敗奔宣平縣、龍坑地方，嘯聚餘黨，復行狂逞。遂遣遊擊田萬侯往擊敗之，馮公輔遁走。我師抵宣平，進至大旗口，遇馮公輔率

賊伏避叢莽，見我師至，以死鬪，我師分三路接戰，自辰至午，賊敗走。追至賊寨，奪隘而入，殺賊二千三百六十餘名，擒都司徐之英，焚其巢。四月，疏報僞騎都尉連登雲由松溪，僞總兵徐尚朝由溫州，兩路來犯處州。遣副都統馬哈達、三等台吉查渾等擊敗之，擒斬僞參將陳亮等三十四員。五月，招撫僞參謀葉存忠、僞總兵韓六合等一百六十餘員，兵一萬九千餘名。閏五月，疏報逆賊三路侵犯處州，敗之於十八都石塘、石佛嶺等處，恢復松陽縣。又擊敗於宣平、武義二縣，大王嶺、東隴隘口、上套寨、下五塘等處，屢敗之。招撫僞官一百三十餘員，兵一萬餘。八月，疏報我師自土木嶺進勦半山嶺賊，大敗之。賊將曾養性棄營拒守黃巖，遂遣貝子傅拉塔往圍之。曾養性夜突圍走溫州，餘賊開門降，遂復黃巖。九月，疏報破僞將軍馬九玉、副將李廷魁兵於衢州府北元口山，斬獲甚衆，燬其營。賊復盤踞夏州河西，於八月中旬舉火，突犯駐防官兵營。八旗兵奮勇往擊，追勦二里許。賊復犯江家山營，又大敗之。十月，疏報破賊衆於上塘嶺，生擒僞官三十五名，兵五百餘，恢復太平、樂清、青田三縣，及大荆、磐石二衛。十一月，疏報十月大兵進攻溫州，敗賊於南江、石塘等處，僞副將朱起龍自溫州投誠。

十五年三月，疏報大兵困溫州，敗僞都督曾養性等兵四萬衆，陣斬僞都督孫可得、僞總兵李節等三百餘人，殺賊二萬餘。仍撥兵立營江岸，以遏賊往青田去路，賊勢大挫。又擊敗於八帶橋、張村，大破之。五月，疏報賊帥馮公輔攻陷宣平，夸蘭大黨喀里敗之於陶村夏灣等處，追至宣平大破之，恢復宣平縣。生擒僞遊擊、都司、千總、把總等八員，斬賊九百餘級。六月，疏報寧海將軍貝子傅拉塔率師過三角嶺，循江路進擊僞都督曾養性於古溪路，拔其營，斬三百餘級，以火礮擊沉其船。大路乃通，遂抵溫溪渡口。擊僞都督馬成龍、僞總兵陳貴兵，大敗之。追十里許，殺賊千餘，生擒百餘名。降僞都司鄭雄、遊擊馬國銘等。僞將軍馬九玉敗奔，遣副都統馬哈達往追之。八月，至仙霞關，分路夾攻。翌日，僞參將金應虎等獻關降，於是長驅直進，

拔浦城，又攻克建陽縣。進至建寧府，賊兵遁，恢復府城，獲偽劄軍械無算。十月，疏報親帥師抵延平府，僞將軍耿繼美以城降。耿精忠懼，隨遣精奇尼哈番劉蘊祥獻偽總統將軍印，續遣子耿顯祚來迎我師，王遣人賁免死，勅諭前往諭之。十月初四日，耿精忠率文武官弁出城迎降，獻所屬官兵冊籍。十二月，疏報僞將軍黃朝用、黃高，僞親軍侯都尉白顯忠，各率僞官兵相繼投誠。遣人招撫耿繼善，繼善先棄邵武城遁往江西。時海賊鄭錦，以僞總統許耀率兵三萬直逼福州，至烏龍江、南小門、真鳳山等處結寨。遂遣參贊軍務都統喇哈達率兵進剿，大敗之。追擊四十餘里，恢復泰寧、建寧、寧化、長汀、清流、歸化、連城七縣及汀州府城，招降僞官七十三員，兵丁二千五百。

十六年，疏報副都統伯穆和林等，遣滿洲兵恢復福建上杭、武平、永定及江西瑞金等縣，招降僞總兵尹雲龍、曾顯洪、張威，及僞副將知縣等官二百十九名。贛州路通。又疏報大兵進剿興化，連破海賊二十六營，陣斬僞總督趙得勝、僞總兵、副將等六十二員，恢復興化府。守仙遊縣，僞總兵郭維藩率衆投誠。三月，疏報克泉州府。海賊潰遁，陣斬僞虎衛將軍許耀，僞總兵六員，僞副將三十一員，安撫所屬各縣難民。又疏報海賊棄漳州海澄而遁。海澄僞副將孫紹芳、漳州僞知府程夢簡等相繼於軍前納款。寧海將軍喇哈達率大兵於二月二十日抵漳州，遂復府城及海澄等十縣。閩地悉平。聖祖嘉其績，特諭曰：「王統率大兵，自衢州入仙霞關，直抵福州，勦撫并用，所向克捷。擊逐海賊，收復全閩，安輯百姓，克奏膚功，深爲可嘉。」

七月，疏報僞將軍樂燦呈繳僞印劄，率衆投誠。十月，疏報漳州龍溪縣班山、泉州南安縣五都、同安縣三保溪等處，逆賊立營寨，盤踞山谷，騷擾百姓，爲害已久。遣前鋒參領都克納、侯馬三奇、副將馮兆京、副都統紀爾他布等，率滿漢官兵於班山等處進剿賊衆，屢敗之，併招撫僞副將黃邦漢等。十一月，疏報夸蘭大杜巴等，統官兵敗賊朱寅等於泉州關口。總兵官侯馬三奇等敗賊於和平橋、草蒲巷。副都統伯穆

和林、副都統鄂申巴圖魯、總兵官侯馬三奇三路進兵，恢復石井清寺。十二月，疏報海賊率兵五千餘，圍泉州府所屬小營地方，副都統楊鳳翔、提督段應舉往援，擊敗之。生擒偽副總兵黃忠等百餘人，水陸共殺賊三千餘。

十七年二月，疏報逆賊韓大任、陳堯元、李懋珠等，率偽官九百五十四員，兵一萬三千三百一十九名投誠。四月，疏報閏三月，官兵連破漳州海賊，陣斬偽提督、總兵等，焚燬賊營，獲偽印劄、船隻、器械無算。九月，疏報遣署副都統禪布等統兵進勦海賊，兩路夾攻，恢復惠安縣，解泉州圍。十二月，疏報都統賴塔等，於十月二十七日敗海賊於柯鑑山、萬松關。副都統紀爾他布、總督姚啓聖、提督楊捷等，敗賊劉國軒於江東橋，又敗之於潮溝之間。副都統胡圖敗賊吳淑於石衛寨，斬獲無算，盡奪賊寨，沉其船。

十八年正月，疏報副都統紀爾他布、巡撫吳興祚，擊賊劉國軒、吳淑、何祐等於郭塘歐溪頭地方，大敗之，追至江邊。斬首二千餘級，生擒偽總兵一名，偽副將二名。五月，疏報海賊偽總統劉國軒等侵犯江東橋，平南將軍賴塔等統官兵迎擊，賊敗走太平寨。我兵追勦，殺千餘人。八月，疏報偽總兵楊彬、黃栢，偽水師三鎮總兵吳定芳，偽副將陳化甲等，及偽總兵張文魁各率偽官兵丁相繼投誠。十月，疏報擊敗賊衆於東石地方，斬偽總兵陳深等。十一月，疏報敗海寇於鰲頭山。

十九年三月，疏報海中大定、小定地方，逼近廈門、金門，係我師必由之道。逆賊鄭錦遣偽將軍張志屯糧聚衆，欲據此地以待我師。臣遣駐防杭州副都統鄂申巴圖魯率滿洲綠旗兵進大定地方，奮勇勦殺，賊遁。尾其後，斬獲無算。焚燬賊巢，恢復大定、小定地方。又疏報大兵水陸分進，規取玉洲。賊渠劉國軒奔竄石馬、海澄，爲我兵進勦甚急，復走廈門。隨遣官招撫海澄偽總兵蘇堪，即開西門來迎我師。玉洲、石馬、海澄悉行恢復。五月，疏報追勦海賊偽帥劉國軒等，於三月十二日克取銅山，焚燬賊巢，併招撫偽總兵楊

祿、張輝等大小僞官共二千五百餘員，兵丁二萬五千九百餘人。六月，疏報招撫僞將軍江機等僞官一千一百三十八員，兵丁四萬三千六百二十九名。十月壬寅，凱還。聖祖率諸王大臣等郊迎於二十里外，命傑書至黃幄，近前抱見，賜坐御座右，賜茶。旋擢任議政。

二十二年正月，疏言：「官兵向駐永興城中，與賊對壘，仰荷天眷，靈神顯助，於雞公山真武廟旁豎旗列隊。一時官兵賊衆，無不共見。於是我軍氣奮，賊勢退沮。其雞公山廟神，理應特致褒旌祀典，以垂永久。」旋奉旨如所請，春秋致祭。

二十九年七月，以厄魯特噶爾丹叛，命王等率兵前往，會撫遠大將軍裕親王福全軍。七月，復奉命率兵防守歸化城。三十六年閏三月庚寅薨。諭祭二次，謚曰良，建碑墓道。文云：「朕丕纂鴻業，誼篤天潢。敦念本支，每優眷禮。其在宗英茂德，茅土早膺，用命疆場，勤勞懋著。生既邀夫寵錫，歿宜被以隆施。爾和碩康親王乃和碩禮親王之孫，蒙世祖章皇帝推恩屬籍，授以多羅郡王之爵，尋進親王，續乃祖服。後參議政之列，得備機務之間。洎命將戡除三逆，勅爲奉命大將軍。指授方略，俾帥師由浙取閩。王仰承廟算，勦撫寇賊。巖疆既奠，振旅還朝。圭組雍容，恪勤罔替。朕彌嘉乃勞績，王益持以小心。方期荷茲寵光，永享多福。而退齡未究，一旦溘亡。軫憶生平，用深悽惻。爰遵憲典，載錫諱章。賜葬易名，以光泉壤。嗚呼，勦留竹帛，尚思宣力之懿親。澤沛宗藩，懋展飭終之令典。勒垂琬琰，式賁松楸。」

七月，以子椿泰襲康親王爵。四十八年六月，椿泰薨。賜祭葬如典禮，謚曰悼，立碑墓道。文云：「國家懋建宗藩，延及後嗣，昭垂典禮，備極始終。所以廣敦睦之仁，示親愛之誼。故其生也，既膺華靡之榮；其歿也，宜有優崇之錫，情至厚，恩至渥也。維王派出銀潢，支分玉牒。襲祖父之世服，繼榮顯之重封。方冀克享遐齡，多福是荷。詎意忽傷早世，中道云亡。既灌卣之再行，復垣塋之式建。爰循舊典，聿表貞珉。爲王易名，

謚之曰悼。嗚呼，分珪列爵，既覃厚於生前。幽壤餘光，庶祇承於身後。用頒寵命，昭示來茲，不亦休歟。」
子崇安，以是年十月襲康親王爵。雍正五年，奉管理宗人府事。十一年九月初七日薨，謚曰修。賜祭一次。十二年四月，以悼王第三弟輔國將軍巴爾圖襲康親王爵。

和碩穎親王薩哈廉，和碩禮親王代善第三子也。天姿聰敏，通曉滿、漢、蒙古文義。屢從征伐，所向有功。天命十一年，封貝勒。四月，討多羅特，率三旗兵斬其孤魯台吉。十月，隨父大貝勒代善往征喀爾喀扎魯特部落，執十四貝勒，又殺吳爾寨圖貝勒，盡俘其子女、人民、牲畜而還。

天聰元年五月辛未，太宗文皇帝親統大兵伐明。薩哈廉與兄岳託率精騎前行捉生探信。辛巳，與兄岳託率偏師往衛塔山運糧士卒。有明兵二萬，與我前軍八十人遇，擊敗之，盡獲其馬匹甲冑。癸巳，大兵進圍寧遠。明總兵滿桂，率兵及密雲兵出寧遠城東二里，列陣於南，環攻於後。我大兵擊敗其衆，追至城下。薩哈廉同諸貝勒繼至，分兵勦殺，遂大殲之。是役也，薩哈廉被創，戰彌厲。

三年十一月，從太宗征明。丙申，薩哈廉等赴通州，相視渡口，兼捕哨卒。辛丑，大兵逼明北京，至德勝門，大同總兵滿桂、宣府總兵侯世祿、寧遠巡撫袁崇煥、錦州總兵祖大壽以兵來援，薩哈廉同大兵擊敗之。十二月壬申，同諸貝勒往略通州，焚其船，遂攻克張家灣。丁丑，圍永平府，進克香河縣，又敗明三河山之蒙古兵，進克永平。四年正月，同濟爾哈朗貝勒奉命統兵一萬，留守永平府。有李春旺者，造言將屠城以惑衆，斬之，梟其首以示。別遣人執旗招諭，近城之臺頭營、遷安縣、灤州、建昌營皆降之。四月壬子，明兵自樂亭、撫寧諸縣來攻灤州，薩哈廉率兵往擊之。抵灤州河岸，敵兵遁，乃還。

五年七月，初設六部，以薩哈廉管禮部事。十一月，察哈爾國兵侵阿魯蒙古駐收之西拉木輪地方，薩

哈廉奉命同豪格貝勒率兵四百往征之。尋聞察哈爾兵遠遁，乃還。六年五月，同濟爾哈朗貝勒等率右翼兵略歸化城、黃河諸路，俘獲蒙古千餘。

七年六月，太宗命諸貝勒大臣各抒所見，陳奏時事。薩哈廉奏言：「明與察哈爾、朝鮮三國，若論緩急，當寬朝鮮，拒察哈爾，而專征明。蓋察哈爾國，我雖不加征，如蟲食穴中，勢必自盡，不煩急圖。至於明國，實不可緩。若我兵少緩一年，彼必固守一處。臣意謂當視我秋成豐歉，乘彼禾稼方熟，即往攻之。進兵兩次，必有頭緒。何以言之，初次激勸士卒，惟量留兵固守以防察哈爾。其沉重器械，不必携往。聖上與諸貝勒惟率精騎直入，盡力勦殺，儘取其物，即速出邊。至第二次，則聖上與未出痘貝勒且勿往。惟以科爾沁全部兵，及外藩蒙古兵，與我八旗擺牙喇一半出屯外郊，哨探固守，以防察哈爾。再數遣人往說祖大壽，命已出痘貝勒將帥，率訓練之兵預備器械，自一片石入奪山海關，則寧遠、錦州爲無用矣。不然，仍從故道而入，斷絕北京四面之路。相度地形及糧餉充足之地，奪其四城，據守勿歸。二三年中，縱兵奮攻，有不就緒之理乎？如此攻戰，而猶未速就緒，且有急於懷歸之心，則甘受誑君之罪。」

七年八月，遂同諸貝勒略明山海關一帶，俘獲人口及牛馬無算。八年二月，同諸貝勒攻廣鹿、長山二島，共獲男子一千四百五名，婦女幼小二千四百六十六名。五月，從大兵西行。六月，同諸貝勒奉命由喀喇俄保地方入邊，攻得勝堡克之，盡殲其兵。城守參將李全自縊死。復隨父大貝勒代善進兵大同，攻懷仁縣。八月，略代州。獲一人，言代州西崞縣城北面頽壞。薩哈廉夜半往襲，遂拔之。王鏊堡、板鎮堡二處人民聞我兵至，各潛遁，獲財物甚多。復擊敗代州騎兵步兵，追至城下乃還。

九年，同墨勒根代青貝勒多爾袞及岳託貝勒、豪格貝勒統兵往收察哈爾林丹汗子額爾克孔果爾額哲，途遇察哈爾汗妻囊囊太后、瑣諾木轄台吉，率部下一千五百戶來降。遣人引還朝見，隨督兵前進。抵額

哲所駐托里圖地方招降之。兼於額哲之母蘇泰太后福金處，得歷代傳國璽。初我兵未至，有鄂爾多斯之部落濟農者，來招額哲，令遵其約束，盟畢已行。我兵追及，羈留之。令其將察哈爾額爾克楚虎爾妻，及部下官民、一切諸物在其國者，俱着送還。時岳託貝勒有疾，分兵駐守歸化。薩哈廉同多爾袞、豪格兩貝勒進略山西。自平魯衛入趨朔州。明寧武關參將率兵來探，縱擊敗之。直抵長城，拆城夜進，破明羊房口步卒。遂毀關入略代州，至忻州。明兵千餘從忻州出戰，擊破之。及忻口，明總督遣副將領兵七百從代州來探，我左翼兵追擊至崞縣。旋出長城，由應州赴平魯衛，敗明步騎五百。我殿後兵復掩殺明援兵三千，又殲其臺上潰兵五百餘人。是役也，我兵大捷，俘獲人畜七萬六千二百餘。乃出邊至歸化城，與岳託貝勒會。凱旋時，太宗親率諸貝勒大臣等遠迎之。

崇德元年正月，有疾。太宗臨視再三，見其羸瘦，愀然淚下。四月議功，擬封多羅郡王。五月壬子，薩哈廉貝勒薨，年三十有三。

薩哈廉明達政事，掌理禮部事務，凡一切皇猷，大有贊助。前一日薩哈廉病篤，鄭親王濟爾哈朗、豫親王多鐸、肅親王豪格會同諸大臣，恐聖駕臨視，遣內弘文院大學士希福、內國史院學士羅碩奏言：「古制，此等有事故之家，人君無降座親臨之例。聖上舉動，不宜照前。今既受尊號，正大位，宜倣古帝王之制。且當病卧之際，聖上屢遣大臣存問不絕。聖上復親視數次，恩禮不爲不隆矣。伏乞聖裁，俯納臣等之請，嗣後此等有事故之家，悉停其親臨悲痛。」太宗諭曰：「爾等所見固是。但當我國褊小之際，尚然樂則同樂，憂則同憂。今諸兄弟之子，視朕猶父，朕亦視之猶子。子有故，父不往視可乎？今後凡未與政事幼子及婦輩有事故者，爾等當諫止可也。」於是三王及諸臣皆敬服。

是日辰刻，太宗臨視薩哈廉疾。有頃，薩哈廉薨。太宗悲悼不已，諸王力勸乃出。稍坐，復入哭。舉酒三

奠，慟益甚。禮親王代善跪請還宮，不允。人哭者四，不勝悲慟。諸王及固山額真等跪勸曰：「聖躬至此已久，即宜還宮。」至午乃還，猶不入宮，於庭中設幄座，不御飲食。代善聞之，遣昂邦章京阿山、梅勒章京圖爾格奏言：「臣已飲食矣，請聖駕入宮。」於是至戌時乃入清寧宮。輟朝三日。王戌祭薩哈廉貝勒，太宗仍親往奠酒慟哭。追封爲和碩穎親王，賜之冊文曰：「爾薩哈廉乃吾兄之子，掌理禮部事務，贊勳典禮，宣力國家，厥勳甚茂。爰倣古制，追封爾爲和碩穎親王，俾功名垂於萬世。」讀畢，復痛哭三奠。諸王及文武大臣無不泣下。於是命和碩兄禮親王代善先歸其第，太宗乃還宮。

六月，太宗在翔鳳閣偶寢，夢至一殿內，與禮親王代善及穎親王薩哈廉偕坐。太宗見穎親王，默念此人已故，朕不宜在此。遂避還盛京，路遇儀仗左右排列，後有人追至，請曰：「穎親王乞聖上賜牛一頭。」太宗曰：「如此即賜之。」駕行不數武，忽碩託阿格又自後追至，奏曰：「穎親王令臣求聖上賜牛。」太宗又曰：「與之。」及覺，乃夢也。遂以所夢問內院大臣希福、剛林、詹霸、胡邱等，衆對曰：「聖上思慕甚切，故有此夢。」太宗曰：「不然。朕未嘗思之，此夢最爲真切。於是希福等機會典視之，凡親王薨，初祭時欽賜一牛。希福等甚奇之。奏聞，太宗亦甚奇之。因命禮部備牛致祭，其文曰：「皇帝諭祭和碩穎親王。爾身雖歿，爾性實靈。所請太牢之禮，已感於夢。朕察古禮，親王薨逝，初祭有用牛之例。前者不知，故未嘗用。今既見夢，又合古禮，朕甚奇之。特遣大臣祀以太牢，以慰爾心。」康熙十年五月，追諡曰毅。

子阿達禮封多羅郡王，以罪誅。次子勒克德渾，封順承郡王。

多羅順承郡王勒克德渾，穎親王薩哈廉次子也。其兄阿達禮，原襲父郡王爵。順治元年，以謀立睿王多爾袞伏誅。勒克德渾坐兄事，黜宗室籍爲庶人。順治元年十一月，世祖章皇帝以阿達禮謀立睿王多爾袞

時，勒克德渾年幼，未諳事務，仍令入宗室籍，封多羅貝勒。

二年七月，奉命爲平南大將軍，往江南代定國大將軍豫親王多鐸平定閩浙。是時故明唐王朱聿鍵僭立福建，魯王朱彝棨竊據浙江。僞大學士馬士英等率兵渡錢塘江，至杭州城十里立五營。勒克德渾遂遣滿漢官兵進剿。未至，敵先渡江遁去。九月，遣左翼梅勒章京朱瑪喇等，大敗馬士英於餘杭。遣右翼梅勒章京何託等，敗僞總兵方國安於富陽。斬僞副將二員，僞參將遊擊五員。及兩翼會合，回兵於杭州三十里外，突遇賊兵，復大敗之。後馬士英、方國安渡錢塘江，窺杭州。守杭州梅勒章京季什哈、總督張存仁、總兵田雄等，率官兵擊敗之，溺水死者無算。杭州、紹興等處悉平。既而湖廣流寇一隻虎等猖獗。十一月，勒克德渾奉命同鎮國將軍鞏阿岱、固山額真葉臣，率朱瑪喇所統擺牙喇官兵，及科爾沁國官兵二百員名，烏真超哈官兵二百員名，并前駐防江寧官兵，往湖廣剿一隻虎。十二月，自江寧乘舟向湖廣進發。三年正月，抵武昌。偵知馬王二總兵，自岳州叛降僞總督何騰蛟於長沙，遂遣蘇章京、博洛惠等率兵追擊。遇叛賊千餘掠臨湘，盡殲之。進兵至岳州，王總兵聞風遁走，馬總兵預從水路遁去。降副將黑運昌，獲船二百餘隻。師至石首縣，聞賊渡江圍攻荊州，賊船千餘隻停泊江上。遣尚書覺羅郎邱等率兵赴南岸，俟賊渡江，捉其船隻，即行督剿。大兵去荊州百里，既渡江，盡夜疾馳，以二月初三日清晨抵荊州，賊竟不覺，尚爾攻城。大兵分兩翼直入賊營，大破之，斬獲甚衆，薄暮收兵。前所遣郎邱等，於荊江南岸獲賊船千餘隻以歸。次日，分遣奉國將軍巴布泰等，兩路追剿賊兵於安遠、南漳、關王嶺、襄陽府等處，撲殺殆盡。大兵遂進彝陵。流賊李自成弟李孜、僞磁侯田見秀、僞義侯張耐、僞武陽伯李佑、僞太平伯吳汝義及僞將三十九人，馬步賊兵五千餘名，詣軍前降。獲玉璽一顆，人口無算。荊州等處悉平，惟一隻虎遠颺未獲。捷聞，詔旨優獎，下所司查敘。七月，班師還。賜黃金一百兩，白金二千兩。